

Panevin

Carlo Dariol

Chi véa campi, roba da brusar ghe ne véa senpre. Se bruséa quel che no servìa pì: rame de vide bruscàe, segàt de fossi, roba vecia... Ma tra i foghi che se féa durante 'l ano *'uno'* el jera el fogo par antonomasia: el panevin, 'a sera del 5 gennaio.

A partir da novembre, tut quel che véa da esser brusà el jera stat mess da parte. Qualchedun véa mess da parte anche 'e fassine dei ganbi de soturco, batù in istà.

Servìa el pal: de sòito un pal de gazìa. 'E fameje che par tradizion féa el panevin un pal 'e lo véa senpre, e 'e savéa dove procurarse 'e fassine. Chealtri ndéa in grava. Ma 'a grava jera de tuti sol che par caminarghe: alberi e piante jera de quei che véa fità i loti dal demanio.

Chi che jera *'chealtri'*? I jera i tosati che voéa dar mostra de spirito de iniziativa e far gara co i panevinari storici. I jera grupi che nasséa spontaneamente ogni ano.

'A gara su 'e dimension (i mas-ci à 'sta fissa!) no poéa ndar pì su de l'altezza de 'na bea pianta de gazìa. Restéa alora 'a gara a farli durar de pì, e cussì se bruséa covertoni de machine, adiritura quei de camion, che ardéa do dì, 'assando in tera, in mezo 'a zénare, un fass de zerci de fero brustoeà. Sol ani dopo sarè rivà i divieti, parché "èmolto cancerogeno".

Adelchi, fituario de un toc de grava, a domandàrgheo un bel pal dret de gazìa el te 'o regaéa, sol che el véa da essar lu a sièglierlo, secondo 'e so necessità de sciaridamento; el te 'o tajéa, anca: bastéa farghe a ciocheti 'e rame tajae e sistemarli int'e cassette de legno, in modo che el vesse 'a scorta par 'l inverno. Melzi lo savéa perché el véa zà parlà co lu e el scambio ghe paréa equo; Savoia invezze no voéa domandarghe piazeri a nissun: el voéa trovàrseo lu el pal, el pì alt che'l trovéa in grava, anca 'a costo de tajarlo de scondiòn. Lu jera tipo da sfide: qualche ano prima par mesi

e mesi el véa sfidà i coetanei su de un argomento dove che'l savéa de essar in vantajo: "Ti atu i péi?" (lu che adess ghe n'è anca su 'a schiena). Melzi, che s'incontentéa del pal regaeà da Adelchi, no jera d'acordo de robarlo, e i do jera rivai a sbarufar, obligando el grupo a spacarse in do, i "legalitari" co Melzi, i "aventurieri" co Savoia. I do semigrupi jera ndati ognun par conto suo, el primo co Adelchi, el secondo in zerca del pì bel pal de 'a grava, e i lo véa trovà e tajà e portà casa, a man, dato che el paron del caret jera restà co i "legalitari".

'E cane pa far fassine jera dapartut, drio tuti i fossi ma specie in grava, tra 'e gazie e su 'a riva. Ghe jera zone cussì fisse de cane che jera un piazer disboscar; ai fitàvui de 'a grava a volte ghe féa comodo che el tosatàn, co l'ocasion del panevin, ghe netesse tochi de àrzerè o de riva. Ma el pì dee volte 'e cane ghe servìa a lori. Par questo i panevinari de l'ultima ora, che no véa otegnù permessi da nissun, i ghe ne tajéa un fià qua e un fià là, in modo che nissun se lamentesse (i famosi "tagli lineari"!), stando 'tenti a no dar int'el ocio, svelti a ligar 'e fassine (pìcoe, parché fate de corsa e parché i tosati no jera granché muscoeosi) e a portarle sùito sul caret sora 'l àrzerè, in zona neutra e salva, pronti a dir, se mister X, paron, passéa de 'à, che «i le véa fate-su sul toc de mister Y».

Melzi jera de l'idea de robar cane dove che podéa tornarghe ùtie ai paroni sciaridar, dove che 'e jera cressùe in mezo al passajo, dove che 'e intrighéa 'l acceso ai aprodi del fiume. E cussì el so grupo véa lavorà tuta 'a mattina pa inpenir sù e no do careti de fassine striminzie; i varèe dovest tornar in grava anca dopo mezdò par rinpolar el panevin.

Savoia jera par l'economia del lavoro, ossia par disboscar dove che ghe ne jera tante e bèe e comode e pronte al uso. Chea mattina lu e el suo grupo véa preferìo far scorta de covertoni: i ghe ne véa recuperà ben oto de machina e adiritura do de camion, che i véa fat rodoear drìo i stradoni de canpagna fin al canp de Savoia: el so panevin jera destinà a essar pì grando e pì longo no sol de quel de Melzi ma anca de quei dei panevinari storici. Dopo disnar j "aventurieri" se véa dat appuntamento in grava par

far-su fassine. E sùto i vea trovà un bel toc de riva pien de gargane, ma pien!, un splendido canton de fiume che el muro de gargane rendéa pitoresco; ma el jera un fià massa in vista, se 'o vedéa fin massa ben dal àrzere de 'a grava. Rivai là senza carét, i spetéa a momenti el salvador che véa da portàrgheo; ma intanto, cossa far? Un bengodi de cane longhe e grosse, e nissun che spiéa sul àrzere... Mejo darse da far, el carét sarèa rivà. Al "via!" i taca coi corteàzi, come forsennai: una, do, tre, squasi par magia 'e fassine nasséa bèe grosse; no 'e pol però restar là in tera, a vista, in atesa del caret; Savoia ordina de portarle int'un canp là vizin e de sconderle tra do gazie strete, che paréa innamorèa da quant 'e rame jera ingropae. Ma el caret no riva. Un dopo de che'altro i "aventurieri" va in avanscoperta, chi in zerca del carét, chi in zerca de 'un' carét, chi in zerca de chi che jera ndat in zerca del caret; Savoia resta da sol, a guardia dee so bee fassine. Ma jera un ris-cio restar là: el fituario de chel trato de grava varèa poest rivar al improvviso e acusarlo de ver tajà 'e fassine sol suo, intimandoghe de 'assarle là. Poéo dirghe che le vea tajàe "de 'à"? Cossa far, cossa no far... Savoia sconde 'e fassine meglio che'l pol e el va via, bestemando contro 'a stupidità dei so conpari, gnanca boni de trovar un carét.

El pomeriggio jera finio. El grupo de Melzi véa fat-su seteoto fassine strete e porete e tornéa casa... quando un de lori che caminéa davanti vede, incastràe tra i alberi, 'e bèe fassinone de cane gargane. El ciama chealtri. I se varda. I se capisse: int'un cit (o squasi, parché le é pesantone) 'e fassinone le é sora 'l àrzere, sul carét, sora de chealtre, e lori core de corsa verso el paese, col stracarico sporgente e 'a punta dee cane che toca in tera; stremài, i gira pal stradon che mena al canp dove che i véa piantà el pal e sistemà 'e pore fassinete de 'a matina; i cava queste par far posto a quee robàe e i le rimete par de sora, a sconda el furto, ma solo fin a tre quarti.

Savoia, sul so canp, varda 'a pila de covertoni – i do de camion soto e quei de machina par de sopra – che coverze el primo quarto del pal enorme, gigantesco spiedin de 'a Miscelèn, e intant pa 'a trentesima volta el passa in rassegna 'a lista de tuti i proprietari de un carét. Possìbie che nissun poésse prestàrgheo?

RAPIDO DIZIONARIO (<http://www.elevamentealcubo.it/crocedipiave/Dizionario.htm>)

grava = golena

gazia = acacia

s-ciaridamento = diradamento

rame de vide bruscàe = tralci di viti patate

el segàt (dei fossi) = lo sfalcio comprensivo di tutto, di erbe più o meno morbide

el tosatan = la gioventù

dopo disnar = nel pomeriggio

Miscelèn = è la marca di pneumatici